

# Fjallskilasamþykkt fyrir Austur Skaftafellssýslu

**Nr. 601, 3. september 1999**

## **I. KAFLI**

### **Um stjórn fjallskilamála o.fl.**

#### **1. gr.**

Sveitarfélagið Hornafjörður (Austur-Skaftafellssýsla) er eitt fjallskilaumdæmi. Yfirstjórn fjallskilamála í sýslunni er á hendi Bæjarstjórnar Hornafjarðar, sem jafnframt fer með hlutverk héraðsnefndar skv. lögum og reglugerðum.

#### **2. gr.**

Fjallskiladeildir í sýslunni skulu vera Lón (með sömu mörk og Bæjarhreppur áður), Nes (með sömu mörk og Nesjahreppur og Hafnarkauptún áður), Mýrar (með sömu mörk og Mýrahreppur áður) Suðursveit (með sömu mörk og Borgarhafnarhreppur áður) og Öræfi (með sömu mörk og Hofshreppur áður). Bæjarstjórn getur með sérstakri samþykkt ákveðið aðra skiptingu í fjallskiladeildir og breytt mörkum þeirra.

#### **3. gr.**

Landbúnaðarnefnd Hornafjarðar fer með fjallskilamál í sýslunni í umboði bæjarstjórnar. Nefndin skipar fimm menn í fjallskilastjórn sem sér um stjórn og framkvæmd hinna árlegu fjallskila. Skal þess gætt að í fjallskilastjórn sitji einn aðili frá hverri fjallskiladeild og er sá jafnframt fjallskilastjóri innan sinnar deildar.

Hlutverk fjallskilastjórnar er:

- að mæla fyrir um lögleitir og réttir í sýslunni, göngur í fjalllendi og aðrar þær smalanir sem samþykkt þessi tekur til,
- að gefa út fjallskilabréf fyrir hverja deild þar sem fram kemur hvernig einstök svæði skuli hreinsuð af fé og fjallskilum jafnað niður,
- að ákveða eftirleitir ef ástæða er til og sjá um hreinsun heimalanda og vorsmölun samkvæmt ákvörðun landbúnaðarnefndar.

Í störfum sínum skal fjallskilastjórn sérstaklega gæta að samræmi í dagsetningum milli svæðanna þannig að ekki þurfi að leggja aukaverk í smalanir á svæðum sem þegar hafa verið hreinsuð.

#### **4. gr.**

Land það sem fjallskilasamþykkt þessi nær til, skiptist í heimalönd, afrétti og öræfi. Heimalönd eru fullkomin eignarlönd manna. Í skilningi samþykktar þessarar skiptast heimalönd í heimahaga og útlendur. Til heimahaga teljast svæði á láglendi næst húsum, ræktarland og önnur svæði innan hagagirðinga. Til útlendna teljast aðrir hluta heimalanda, svo sem sameiginleg sumarbeitilönd á fjöllum.

Það teljast afréttir sem að fornu hafa verið, hvort sem þeir eru í eigu sveitarfélagsins, upprekstrarfélaga eða einstaklinga.

Almenningar eða öræfi kallast þau lönd sem óbyggðir eru og sem ekki verða talin til afrétta eða heimalanda.

Landbúnaðarnefnd skal láta gera skilmerkilegt kort af sveitarfélaginu þar sem fram koma mörk einstakra jarða, og sú skipting svæða sem gert er ráð fyrir samkvæmt þessari grein. Skal kortið, ásamt viðfestum skrá, vera fjallskilastjórn til reiðu við niðurdeilingu verka og teljast grundvöllur réttinda og skyldna að öðru leyti.

Landbúnaðarnefnd annast viðhald skráa og korta yfir skiptingu svæða og sér um að slík gögn séu tryggilega birt og öllum aðgengileg.

## **5. gr.**

Bæjarstjórn getur með sérstakri samþykkt, stofnað Fjallskilasjóð fyrir Austur-Skaftafellssýslu. Nánar skal kveðið á um hlutverk sjóðsins í stofnskrá, en heimilt er m.a. að fela sjóðnum umsjón rétta og annarra slíkra mannvirkja í sýslunni. Ennfremur er heimilt að gera vinnuframlög í tengslum við fjallskil upp í gegnum sjóðinn, en að öðrum kosti skal hlutverk sjóðsins takmarkast við að greiða fjallskilakostnað sem ekki verður inntur af hendi með vinnuframlögum.

Tekjur sjóðsins geta samkvæmt þessu verið eftirfarandi:

1. Greiðsla í peningum eða reiknuðu vinnuframlagi sem hagsmunaaðilar inna af hendi vegna einstakra verka í tengslum við fjallskil.
2. Greiðsla í peningum sem fénaðareigendur inna af hendi vegna réttarbygginga.
3. Framlag sveitarfélagsins m.a. vegna rétta og annarra mannvirkja.
4. Andvirði óskilafjár.
5. Sektir vegna brota eða vanrækslu á fyrirmælum samþykktar þessarar.

Stjórn sjóðsins ákvarðar greiðslur sem sjóðurinn innir af hendi í peningum, til þess að standa straum af fjallskilakostnaði, viðhaldi rétta og annarra verka sem sjóðnum eru falin skv. stofnskrá.

Reikningar sjóðsins skulu haldnir sérstaklega en hann skal gerður upp og endurskoðaður með sama hætti og bæjarsjóður.

## **6. gr.**

Landeigandi sér sjálfur um alla smölun heimahaga á eigin kostnað, sjá þó 22. og 23. gr. Fjallskilastjórn sér um fjallskil á afréttum og útlendum jarða. Skal að öllu jöfnu við það miðað, að kostnaði við verk sem fjallskilastjórn mælir fyrir um, sé jafnað niður á fjallskilaskylda aðila í hlutfalli við tölu fjallskilaskylds búpenings innan viðkomandi fjallskiladeildar. Landbúnaðarnefnd getur ákveðið að á tilteknum svæðum skuli kostnaði jafnað milli á hagsmunaaðila, fjáreigenda og landeigenda, í ákveðnum hlutföllum, sbr. heimild í 42. gr. fjallskilalaga nr. 6/1986.

## **II. KAFLI**

### **Um rekstur á afrétti.**

#### **7. gr.**

Um upprekstrarrétt á afrétti einstaklinga fer eftir fornri venju eða samningum. Í framangreint afréttarland má taka búpening til sumargöngu af utansveitarmönnum sem eigi hafa þar upprekstrarrétt en til þess þarf leyfi sveitarstjórnar í því sveitarfélagi þar sem land liggur. Ekki má veita framangreint leyfi ef ætla má að afrétturinn sé þegar fullnýttur af innansveitarmönnum.

#### **8. gr.**

Komi í ljós við ítölu eða á annan sannanlegan hátt að afréttur upprekstrarfélags er ekki fullnýttur en heimahagar jarða í samfélagi ofsetin, er sauðfjáreigendum þeirra jarða skylt að reka til afréttar þann hluta búfjárins sem er fram yfir leyfða ítölu. Verði misbrestur hér á getur sveitarstjórn látið reka fénað á kostnað eiganda. Verði ágreiningur út af grein þessari má vísa honum til úrskurðar sýslumanns.

#### **9. gr.**

Heimilt er landráðanda sem verður fyrir ágangi afréttarpenings að gera kvörtun um það til hlutaðeigandi sveitarstjórnar í samræmi við 31. gr. laga nr. 6/1986.

#### **10. gr.**

Sveitarstjórn getur ákveðið að takmarka og tímasetja rekstur til afrétta á vori. Þegar rekið er til afréttar gegnum heimalönd manna, skal það gert á þann hátt að sem minnstur bagi verði að og er sveitarstjórn heimilt að ákveða hvaða leiðir skuli fara. Aldrei má án leyfis eiganda reka fé á afrétt nema víst sé að það eigi að vera þar.

#### **11. gr.**

Eftir að fé er sleppt í afrétt og allt til fyrstu gangna má enginn smala afrétt né gera afréttarpeningi annað sambærilegt ónæði nema sveitarstjórn leyfi.

## **III. KAFLI**

### **Fjallskil.**

#### **12. gr.**

Með fjallskilum í samþykkt þessari er átt við reglulegar afréttargöngur og smölun útlendna.

Sérhver sauðfjáreigandi er skyldur til að gera fjallskil með þeim hætti sem sveitarstjórn ákveður. Sveitarstjórn getur ákveðið að smölun heimahaga skuli metin til fjallskila. Sveitarstjórn jafnar niður öllum kostnaði við fjallskil í réttu hlutfalli við sauðfjáreign. Forðagæsluskýrslur eða skattframtöl skulu lögð til grundvallar niðurbjörgunar fjallskilakostnaðar. Eigendur eyðibýla eru skyldir til að gera fjallskil ef sveitarstjórn ákveður, skal þá fjallskilakostnaður miðast við landverð jarðar að frádregnu verði ræktaðs lands. Sveitarstjórn getur undanþegið þá menn fjallskilaskyldu sem hafa fé sitt í afgirtum heimahögum eða eyjum.

### **13. gr.**

Skyldur er hver maður að gera fjallskil í því sveitarfélagi sem hann á heimili í. Full fjallskil skal maður inna af höndum í því sveitarfélagi sem fénaði hans er framfleytt í árlangt, enda þótt hann eigi ekki lögheimili þar.

Nú nota einstaklingar eða upprekstrarfélög til uppreksturs annan afrétt eða heimaland en þeim ber. Skulu þeir aðilar þá inna af höndum full fjallskil eftir sömu reglum og heimamenn í því upprekstrarfélagi sem land liggur í. Skal þá miða við fénaðarfjölda þann sem aðkomumenn reka í landið. Þó er heimilt að gera sérstakan samning um fjallskilin. Sá sem notar land utan upprekstrarfélagsins, skal tilkynna það sveitarstjórn í því sveitarfélagi sem hann á heima í áður en tvær vikur eru af sumri.

### **14. gr.**

Fjallgöngur skulu vera þrennar hvert haust. Landbúnaðarnefnd getur þó ákveðið að fjallgöngur séu tvennar. Skulu göngur fara sem mest saman í þeim löndum sem saman liggja.

Samhliða fjallgöngum skal smala til réttar heimahaga sem afréttarfénaður og sumarþeitarpeningur gengur að jafnaði í. Að auki skal gerð eftirleit ef fjallskilastjórn telur ástæðu til.

Fjallskilastjórn ákveður að hve miklu leyti smölun heimahaga skuli metin til fjallskila.

### **15. gr.**

Allri skylduvinnu og öðrum kostnaði við fjallskil skal fjallskilastjóri jafna niður í tæka tíð. Skal fjallskilabréf hafa borist fjallskilaskyldum aðilum eigi síðar en einni viku fyrir fyrsta gangnadag.

Kærur út af niðurjöfnun fjallskila skulu hafa borist oddvita sveitarstjórnar eigi síðar en 15. september. Náist ekki samkomulag getur aðili skotið máli sínu til úrskurðar sýslumanns.

### **16. gr.**

Í fjallskilabréfi skal tekið nákvæmlega fram hvað hverjum ber að leggja til fjallskila það haust. Ennfremur hverjir skulu leggja menn á hvert afréttarsvæði fyrir sig, nefna til gangnastjóra, svo og þá sem sækja skulu fé í utanhrepparéttir.

Vanræki fjallskilaskyldur aðili að gera þau skil sem honum ber skal hann borga þau eins og kostar að inna þau af hendi. Að auki varðar slíkt sektum sem hækka ef brotin eru ítrekuð.

### **17. gr.**

Sveitarstjórnir skulu skipa einn duglegan gangnastjóra eða gangnaforingja fyrir hvern gangna-flokk. Gangnastjórinn skal skipa fyrir um tilhögun gangna og hafa alla stjórn á þeim. Skal hann sjá um að fjársöfnin séu rekin með reglu til réttar og kveðja menn til að gæta safnsins þar til fé-naður er kominn í rétt eða náttþaga. Hver gangnamaður er skyldur að hlýða gangnastjóra sínum.

### **18. gr.**

Gangnastjóri skal áminna gangnamenn að fara svo vel sem unnt er að fénaði í göngum. Ef kindur koma fyrir sem ekki verður komið lifandi til rétta skal slátra þeim og tilkynna

eiganda.

**19. gr.**

Ef fjáreigandi eða jarðeigandi hefur engan færan mann til fjallskila og getur eigi útvegað hann, skal tilkynna það sveitarstjórn eða fjallskilastjóra þremur dögum áður en skilin eiga að vinnast en þessir aðilar útvega mann eða annað sem vantar, svo sem hesta eða fæði. Borgar þá fjáreigandi sektarlaust allan þann kostnað sem af fjallskilum leiðir.

**20. gr.**

Fjallskilastjórnir skulu koma upp hentugum skýlum fyrir gangnamenn á afréttum, þar sem þess er þörf og skal kostnaður sá er af þessu leiðir greiddast úr sömu sjóðum og fjallskil.

## **IV. KAFLI**

### **Hreinsun heimalanda.**

**21. gr.**

Hver bóndi er skyldur til að smala heimahaga sína á haustum. Sama gildir um eigendur eyðibýla þótt þeir eigi þar ekki fjárvon.

**22. gr.**

Sveitarstjórn skal skipa fyrir um reglulegar smalanir heimahaga jafnframt hverjum fjallgöngum. Þar sem heimahagar eru víðlændir skulu smalanir þessar fara fram undir umsjón manns sem hún skipar. Allan óskilafénað sem kemur fyrir skal fara með samkvæmt fyrirmælum fjallskilastjórnar. Sveitarstjórn getur veitt undanþágu frá ákvæðum 21. og 22. gr. þar sem fé gengur í afgirtum heimahögum eða eyjum.

**23. gr.**

Sveitarstjórn skal sjá um að eftir réttir á haustin séu allir heimahagar rækilega smalaðir svo oft er hún telur nauðsynlegt og að fénu verði komið áfram eftir þeim leiðum er hún ákveður.

Þeir sem þurfa að smala víðáttumikla heimahaga eiga rétt á að þau gangnaskil séu metin til fjallskila í fjallskilabréfi.

## **V. KAFLI**

Göngur og réttir.

**24. gr.**

Fjárleitir á öræfum skulu ákveðnar og kostaðar af sveitarstjórn sé talin þörf á. Sveitarstjórn þess sveitarfélags er besta aðstöðu hefur er skylt að framkvæma smölunina. Heimilt er héraðsnefnd að ákveða að fé sem finnst við öræfaleit skuli lógað sama haust.

**25. gr.**

Réttir í Austur-Skaftafellssýslu eru sem hér segir:

Aðalréttir Aukaréttir

Hvammsrétt Setbergsrétt

Meðalfellsrétt

Sveitarstjórnir ákveða hvenær skuli smala til hvernar réttar og skal það tilkynnt hverju sinni í fjallskilabréfi. Fjallskilabréf skal gefið út a.m.k. einni viku fyrir fyrstu smölun.

**26. gr.**

Fénaðareigendur eru skyldir til að kosta byggingu rétta, þ.e. almennings og dilka, eftir því sem sveitarstjórn ákveður. Nú verður ekki samkomulag um hvernig kostnaði við byggingu rétta skuli jafnað niður og sker þá héraðsnefnd úr. Við hverja aðalrétt skal byggður ómerkingadilkur og sérstakur dilkur fyrir sjúkt fé. Ennfremur skulu byggðir nægilega margir dilkar fyrir fé úr öðrum hreppum.

**27. gr.**

Sveitarstjórnir skulu fela sérstökum manni eftirlit með viðhaldi rétta, dilka og nátthaga. Skal hann sjá um að rétt, dilkar og nátthagar séu í góðu lagi þegar þarf að nota þá.

**28. gr.**

Sveitarstjórnir skulu skipa duglegan réttarstjóra við hverja rétt og má réttarstjórnin teljast með gangnaskilum. Réttarstjóri skal láta taka allar sjúkar kindur úr safninu eða réttinni og einangra þær strax og þeirra verður vart. Hann skal sjá um að ómörkuð lömb séu hirt í réttinni og dregin í sér dilk svo eigendum gefist kostur á að láta lambsmæður helga sér þau. Frá aukarétt skulu ómerkingar ganga til aðalréttar með öðru óskilafé.

Réttarstjóri kveður menn til að skoða óskil vandlega eftir markaskrá og mega þau ekkii yfirgefa þann starfa fyrr en lokið er nema með leyfi réttarstjóra. Allir fjáreigendur skulu gæta þess að fé þeirra verði ekki eftir í óskilum. Réttarstjóri skal sjá til þess að allt fé sé tekið úr réttum og komið til skila.

**29. gr.**

Í réttum má enginn marka fénað á þess að skýra réttarstjóra frá því hvaða heimild hann hafi til mörkunarinnar.

## **VI. KAFLI**

### **Hirðing fjár úr utansveitaréttum.**

**30. gr.**

Sveitarstjórn skal, sé þess þörf, skipa glögga og gegna menn til að fara í utansveitaréttir þar sem helst er fjárvon og þar sem fé gengur saman. Skulu þeir hirða fé úr sínu sveitarfélagi eða fjallskiladeild.

## **VII. KAFLI**

### **Um meðferð óskilafénaðar.**

**31. gr.**

Ómerkingum og óskilafé sem kemur fyrir í réttum og ekki finnast eigendur að, skal þegar lógað í sláturhúsi og sér hreppstjóri um að svo sé gert.

Öllum ómerkingum fjallskilasjóðs eða sveitarsjóðs skal lógað í sláturhúsi.

Með fé sem farið hefur yfir varnarlínur skal fara skv. 25. gr. laga n.r. 25/1993 um

dýrasjúkdóma og varnir gegn þeim.

Sé um óskilahross að ræða sem finnst á afréttum eða heimalöndum, skulu þau, ef enginn finnst eigandi, tilkynnt hreppstjóra. Ef þörf gerist sendir hreppstjóri lýsingar á hrossunum til sveitarstjórna nærliggjandi sveitarfélaga. Ennfremur skal hreppstjóri auglýsa óskilahrossin til sölu á uppboði með 12 vikna innlausnarfresti.

Að öðru leyti gilda reglur um lausafjáruppboð um sölu hrossanna. Skylt er landráðanda þar sem hrossin finnast að annast þau til sölundags en rétt á hann á hæfilegu endurgjaldi fyrir.

32. gr.

Fyrir árslok skal sýslumaður birta í Lögbirtingablaði greinilega lýsingu á öllum óskilafénaði sem seldur hefur verið í sýslunni. Í ómakslaun og prentunarkostnað greiðist hæfilegt gjald.

33. gr.

Af andvirði óskilafénaðar greiðist:

1. Gæslukostnaður
2. Sölu­kostnaður (sölulaun og vottalaun)
3. Auglýsingakostnaður
4. Fundarlaun og björgunarlaun

Að öðru leyti greiðist andvirði fjárins til eigenda ef þeir innan septemberloka næst á eftir sanna eignarrétt sinn. Annars verður verðið í sveitarsjóði.

## VIII. KAFLI

### Um eftirleit einstakra manna.

34. gr.

Þegar hinum fyrirskipuðu fjárleitum er lokið má sveitarstjórn leyfa einstökum mönnum eftirleitir á afréttum, annaðhvort fyrir ákveðna greiðslu eða á kostnað leitar­manns sjálfs. Fundarlaun fyrir fé sem finnst í slíkri eftirleit má vera ½ af verði fjárins.

35. gr.

Skyldur er hver búandi að hirða það fé er finnst í heimahögum hans eftir að almennum smölunum er lokið og tilkynna fjá­reigendum.

## IX. KAFLI

Um sveltistökur.

36. gr.

Verði gangnamenn eða aðrir varir við fé í ógöngum eða svelti, skal tilkynna það strax sveitarstjórn eða eiganda lands. Síðan skal svo fljótt sem unnt er gerð tilraun til að handsama féð og færa til skila sveitarstjórnar í því sveitarfélagi þar sem féð er teppt, sbr. 57. gr. laga nr. 6/1986. Heimilt er sveitarstjórn að krefja eiganda fjárins um kostnað við sveltistöku þó ekki meiri en andvirði fjárins nemur.

Sé mjög erfitt að ná fé úr svelti að mati sveitarstjórnar er henni skylt að láta skjóta það sé það unnt.

## **X. KAFLI**

### **Um mörk og markaskrár.**

#### **37. gr.**

Búfjármörk eru eyrnamörk, brennimörk, frostmerkingar og plötumerki í eyra. Skyldur er hver fjáreigandi að hafa glöggt eyrnamark á öllu fé sínu. Sé eyrnamark óskýrt skal hyrnt fé brennimerkt á hægri horni marki fjáreiganda, en kollótt fé sama marki með plötumerki í hægri eyra.

#### **38. gr.**

Allt sauðfé, veturgamalt og eldra, skal brennimerkja með hrepps marki í vinstra horn eða merkja með sama marki á plötu í vinstra eyra.

Merki fjallskiladeilda í Austur-Skaftafellssýslu eru sem hér segir:

Bæjarhreppur Z-1

Nes Z-2

Höfn Z-3

Mýrar Z-4

Borgarhafnarhreppur Z-5

Hofshreppur Z-6

#### **39. gr.**

Fjármörk geta menn erft, keypt eða eignast að gjöf. Heimilt er að taka upp nýtt mark en enginn má taka upp mark er líkist svo mörkum sem fyrir eru í markaskrá sýslunnar eða nærliggjandi sýslna að hætta sé á misdrætti. Mikil særingarmörk má ekki taka upp né heldur þau mörk sem vandkvæði er á að marka svo glöggt sé. Fleiri en tvö undirben má ekki hafa saman á sama eyra.

#### **40. gr.**

Fé skal draga eftir mörkum. Mark helgar markeiganda kind sem mark ber, nema full sönnun komi fyrir að annar eigi.

Óheimilt er manni að draga sér kind sem ekki ber hans rétta mark, hversu lítið sem umfram er eða á vantar.

Ef kind er með brennimarki annars manns en þess er á eyrnamarkið skal sá talinn eigandi sem á brennimarkið. Sönnur skal eigandi brennimarks færa fyrir eignarrétti sínum ef eigandi eyrnamarks krefst þess.

Nú vill maður eigna sér kind ómarkaða, afeyraða eða með óþekktanlegu eða vafasömu marki og skal þá sveitarstjórn kveða til tvo óvilhalla menn til að meta með sér ástæður þær sem hlutaðeigandi hefur máli sínu til stuðnings. Komi þeim öllum saman um að mestar líkur séu til að hann eigi kindina, má hann hirða hana sem sína eign annars telst hún til óskila. Við sönnun á eign á búpeningi er frostmerking réttthæst, þar næst brennimark, þá löggilt plötumerki og síðan eyrnamark.

#### **41. gr.**

Héraðsnefnd skal láta prenta markaskrá áttunda hvert ár. Héraðsnefnd ferlur ákveðnum



manni, markaðverði, umsjón með mörkum og gerð markaskrár. Hann sér einnig um birtingu nýrra marka í Lögbirtingablaði. Markavörður safnar mörkumí markaskrár með aðstoð sveitarstjórna. Sérhver markeigandi er skyldur til að láta birta mörk sín í markaskrá og greiða gjald fyrir sem héraðsnefnd ákveður.

Markavörður skal gæta þess að ekki séu tekin upp ný mörk sem notuð eru í héruðum þar sem búast má við samgangi sauðfjár sbr. reglugerð nr. 579/1989 gr.

11.3.14. varðandi sammerkingar á suðafé.

Nú vill einhver taka upp nýtt mark eða nota aðflutt mark milli þess sem markaskrár eru gefnar út, skal hann fá til þess samþykkti markavarðar sem síðan auglýsir markið í Lögbirtingablaði.

Enginn má nota mark nema það sé birt í markaskrá eða tilkynnt í Lögbirtingablaði. Þeir sem taka upp ný mörk milli þess sem markaskrá er prentuð skulu greiða kostnað við tilkynningu þess. Sama gildir um aðflutt mörk.

Markavörður skal fá þóknun fyrir starf sitt eftir samningi af tekjum þeim sem falla til við prentun markaskrár. Markaskrána skal prenta í það mörgum eintökum að allir markeigendur geti fengið eintak og að auki nokkur til vara.

## **XI. KAFLI**

### **Um rekstur og flutning búfjár.**

#### **42. gr.**

Svo skal rekstrum haga að sem minnstur bagi verði þeim sem lönd eiga sem um er rekið eða í er áð. Varast skal að rekstrar lendi saman við annað fé.

Eigi má halda áfram með rekstra úr því farið er að skyggja nema brýn nauðsyn sé. Eigi má leggja upp með rekstur fyrr en sauðljóst er orðið.

#### **43. gr.**

Óheimilt er að reka hóp búfjár á vegum og í þéttbýli, nema sérstakt leyfi lögreglustjóra komi til. Heimilt er lögreglustjóra að loka vegum um skemmri tíma fyrir annarri umferð en fjárrekstrum.

Utan þéttbýlis má reka búfjárhópa eftir vegum en fylgja skulu hverjum rekstri nægilega margir gæslumenn. Ef vænta má umferðar á vegum skal einn gæslumanna fara fyrir hópnum. Búfénu skal vikið fljótt og greiðlega út af veginum ef þess gerist þörf.

## **XII. KAFLI**

### **Um meðferð og hirðingu búfjár og ágang.**

#### **44. gr.**

Alltaf skal leitast við að fara svo vel með búfé sem unnt er. Eigi má svelta fé við réttir, í rekstrum, í sláturhúsum eða annars staðar, frekar en unnt er.

Fé sem hýst er í sláturhúsum næturlangt skal hafa aðgang að vatni.

#### **45. gr.**

Bannað er að hundbeita fénað í reksti eða smölun að óþörfu. Ekki má heldur misþyrma búfénaði á nokkurn annan hátt. Valdi hundar tjóni á búfé er eiganda þeirra skylt að bæta

það að fullu.

**46. gr.**

Ef búfé annarra veldur óeðliega miklum ágangi er eigandi þess skydlur að sækja það þá honum hefur verið tilkynnt um það. Ágangsfénaði skal eigandi koma fyrir í vörslu eða á afrétti.

Ágangspoli egtur skotið máli sínu til sveitarstjórnar skv. 31. gr. laga nr. 6/1986, sinni fjáreigandi ekki ósk hans um að koma í veg fyrir ágang.

Sá sem tekur fé í vörslu sína má ekki fara illa með það á nokkurn hátt. Hann skal sjá um að nægilegt fôður og vatn sé fært fénu.

**47. gr.**

Kinda sem fara fullgildar girðingar, að dómi úttektarmanna, skulu eigendur gæta svo og stórgripa sem brjóta hlið og girðingar.

Gerir þeir það ekki má sveitarstjórn taka ágangspening og selja fyrir kostnaði og uslagjöldum.

### **XIII. KAFLI**

#### **Refisákvæði og gildistaka.**

**48. gr.**

Brot gegn samþykkt þessari varða viðurlögum samkvæmt lögum um afréttarmálefni, fjallskil o.fl. nr. 6/1986. Með mál út af brotum skal farið að hætti opinberra mála.

Samþykkt þessi sem bæjarstjórn Hornafjarðar hefur fjallað um og afgreitt, staðfestist hér með, samkvæmt lögum um afréttamálefni, fjallskil o.fl. nr. 6/1986, til að öðlast þegar gildi og birtist til eftirbreytni öllum þeim sem hlut eiga að máli. Jafnframt er úr gildi felld Fjallskilasamþykkt fyrir Austur-Skaftafellssýslu, nr. 484, 30. ágúst 1996.

Afgreidd í Bæjarstjórn Hornafjarðar 22. júlí 1999  
að afloknum tveimur umræðum.